

忠

惠

集

四

卷一

卷二

卷三

卷四

詳校官庶吉士臣翁樹培

侍讀臣孫球覆勘

滕錄貢生臣郭 肅

滕錄貢生臣王 穀

欽定四庫全書

忠惠集卷七

宋 翟汝文 撰

狀 劄子 封事

辭免創修大晟樂章狀

朝奉郎新差權發遣提舉京東西路常平等事范慎劄
子奏伏覩陛下執大象以撫域中天人和同幽明感格
比者奠九鼎作晟樂受玄圭行冠禮祀園壇祭方澤莫
不協氣橫流珍沓至天神降格地祇出現皆其盛德

事曠古所未聞也然未有顯大之舉以榮天休以彰美蹟願詔儒官制為樂章以其類而薦之郊廟俾英聲茂實傳於無窮天下幸甚取進止六月十九日奉聖旨應樂章並差翟某重修伏奉勅命應樂章令臣重修者承命震懼不知所措臣聞古者登歌在上乃播八音聲依詠言始協律呂雖有韶濩之作必先雅頌之正所以猗那長發先祀成湯清廟我將周人用饗其上推本有娥姜嫄受命之始其次備載大任大姒作合之德爰暨武

丁成宣褒大其子孫下及周召山甫顯揚其佐命所以
聖君賢臣勲德光明更歷千載震耀如初然則體大事
重未有如此苟非其人孰敢輕議恭惟皇帝陛下肇新
晟樂天地顧答改作禮器比隆商周宜得語言文學之
臣付以聲詩郊廟之奏薦功皇天明詔萬世與大晟中
音合為一律乃以臣愚無知討論是事使蚊負山氣力
幾何伏況臣尪殘早衰百體俱疾心志喪失動輒驚悸
重以姿性駑下辭藝荒蕪雖力誦聖德人臣所願而狂

易妄作未免累國伏況今者侍從臺閣英俊如林才能過臣皆可就事伏望改付能者不至仰辜任使

中書舍人乞罷職狀

右臣駑鈍無能處非其任不幸自少復被犬馬之疾昨於四月間中書舍人蔣猷罷職除郡張滢繼朝陵寢獨臣一員典掌誥命每日草詞二十餘道又撰南路宗室誌銘一百餘道臣前已具奏嘗苦熱疾昏憤然終不敢一日在假恐妨廢造朝力疾勉強只逐急先了日下差

除臣性本駑鈍復更抱疾心力不逮非不願自罄竭遂致當月內宗室仲峭贈官誥詞遲緩聖旨催促臣有司失職罪當顯戮橫恩寬貸止從罰金上荷聖慈以身為慙然不職被譴若尚趨省供職上負朝廷任使之意下乖小臣廉恥之義伏望聖慈特賜矜憫察臣實緣疾病心力不前許解所職以安愚分謹錄奏聞

乞致仕狀

右臣昨蒙恩宮祠叨竊俸廩便親養疾皆得所欲仰荷

陛下生成之恩恨無隕身報國之所而臣賦命蹇薄竊
祿滿盈福過其分災釁隨作臣於今年十月感風痺之
疾左臂不仁艱於舉動右足緩弱步趨不良臣自度半
身已廢無復完人死在朝夕必然之理然而雀鼠貪生
之意猶戀聖時溝壑未填之餘尚存氣息以謂納祿避
寵或可免疾僥覲萬一療治復完伏望聖慈特賜哀憫
許臣守本官職致仕使臣收拾骸骨終獲首丘不勝厚
幸

初除翰林學士辭免狀

右臣今月二十八日準尚書省劄子奉聖旨已除臣翰林學士令臣乘遞馬疾速前來赴闕者聞命震驚不知所措伏念臣頃緣疾病久以乞身竊伏衡茅分甘守死今者擢臣翰墨之選非臣衰朽所能力當上聖勃興諸臣彙進豈不願一瞻天表獲近末光叨預從官少陳薄技而臣筋骸久瘁心志已衰記誦耗於憂患之餘筆硯廢於農圃之業竊慮非時宣召以疾稽留苟誤事或致

於人言雖誅臣不足以塞責伏望聖慈察臣避寵非敢
矯辭追還誤恩仍舊宮觀所有新命伏乞特賜寢罷謹
錄奏聞伏候勅旨

翰林乞宮觀劄

臣於初五日侍立殿廷忽致疾作緣臣少有腰足之疾
不能久立自度難以筋力為禮是致前後兩次陳乞致
仕今來誤蒙聖恩詔還力辭不獲臣勉強親至闕下冀
蒙聖慈察見真實疾病許令從欲今者果于唱第之日

侍立移時頭眩足痛幾至顛隕居家病作至今發腫伏
望聖慈特賜哀憫除臣一宮觀差遣臣非不知陛下恩
意眷遇義當體國臣若貪戀寵祿日復一日必待顛仆
移疾在告然後去則自無恥辱國必致人言上辜君父
下玷班列非所以全終始之恩也伏望聖慈洞察念臣
疾病在身去非得已乞降付三省早賜指揮

乞康王聽政狀

伏聞金師大舉侵逼郊畿太上皇帝今上皇帝陛下二

聖蒙塵逆臣僭號中外臣子罔不痛心元帥大王德望在人勲業甚大躬總戎律王室所憑方今道路不通威令阻隔百姓歸命趙氏係心大王伏望傳令四方總決庶務上體二聖付託之意下聽黎庶歸仰之情指揮將臣征伐強敵收復京邑奉迎乘輿某等情迫於中憂憤所激謹具狀令收武郎王倚忠翊郎趙子昱奔詣行府申聞臣等不勝惶懼激切之至

繳父老士庶狀申康王狀

今月初一日據本州寄居官父老士庶人吏僧道等狀
為鑾輿未回乞請元帥康王總決萬務盡詣本州陳訴
萬口一辭不約而同某等見其誠意激切出於忠義伏
願元帥大王揆察人心審觀時事斷以大義俯從其請
早降王旨施行須至申上者有逐人元狀繳連在前謹
具申兵馬元帥行府謹狀

賀登寶位進奉禮物狀

大人之造如日之升開駿命以無疆鞏丕基而不拔深

仁成物始由湯后之克寬茂烈對時終顯武王之無競
前件物性堅莫變色潔甚純敢修任土之儀共備克庭
之禮

奏杭州軍賊嬰城叛亂狀

右臣今月初二日據管下西興鎮沿江巡檢及權兩浙
都巡檢杭州外沙巡檢杭州司錄范正已等共六狀申
今月初一日夜約三更以來杭州城內有軍賊殺人放
火閉城作過勢燄兇猛乞救應施行事臣尋遣人體探

得係是杭州決勝萬全歸遠龍騎等指揮及第三將軍
兵陳通林永等作過當夜先殺害本州知州安撫使葉
夢得通判軍州事曾倫轉運通判官吳昉及將官白均
等并其餘百姓官吏亦遭殺害自今月初一日夜至初
十日依舊關閉城門每日諸處放火作過未已臣即時
躬親帶領本州兵將弓手保甲等火急前去松江一帶
把截先遣人賁榜入杭州城內曉諭禍福令軍賊等疾
速出降其勢未肯聽順臣已一面分遣屬官並管下六